
OFFERYNNAU STATUDOL
CYMRU

2018 Rhif 1215 (Cy. 248)

AMAETHYDDIAETH, CYMRU

**Rheoliadau Dosbarthu Carcasau a
Hysbysu eu Prisiau (Cymru) 2018**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn, sy'n gymwys o ran Cymru, yn dirymu ac yn disodli Rheoliadau Dosbarthu Carcasau Eidion a Moch (Cymru) 2011 (O.S. 2011/1826 (Cy. 198)) ("Rheoliadau 2011") o ganlyniad i ddiwyddu Rheoliad y Comisiwn (EC) Rhif 1249/2008 (OJ Rhif L 337, 16.12.2008, t. 3).

Mae'r Rheoliadau'n gorfodi'r canlynol—

- Erthygl 10 o Reoliad (EU) Rhif 1308/2013 Senedd Ewrop a'r Cyngor (OJ Rhif L 347, 20.12.2013, t. 671) ac Atodiad IV iddo, sy'n ymwneud â graddfeydd yr Undeb Ewropeaidd ar gyfer dosbarthu carcasau; a
- Rheoliad Dirprwyedig y Comisiwn (EU) Rhif 2017/1182 (OJ Rhif L 171, 4.7.2017, t. 74) ("Rheoliad Dirprwyedig y Comisiwn"); a Rheoliad Gweithredu'r Comisiwn (EU) Rhif 2017/1184 (OJ Rhif L 171, 4.7.2017, t. 103) ("Rheoliad Gweithredu'r Comisiwn") sy'n nodi rhagor o fanylion ynghylch rhoi'r graddfeydd hyn ar waith.

Mae'r Rheoliadau'n ymwneud â charcasau anifeiliaid buchol llawn-dwf (sef anifeiliaid sy'n wyth mis oed neu ragor) a moch.

Mae rheoliad 5 yn ei gwneud yn ofynnol i weithredwyr lladd-dai sy'n cigydda anifeiliaid buchol llawn-dwf neu foch hysbysu Gweinidogion Cymru. Er hynny, nid yw'r Rheoliadau'n gymwys i weithredwyr buchol ar raddfa fach sy'n cigydda llai na 150 o anifeiliaid buchol llawn-dwf yr wythnos ar gyfartaledd bob blwyddyn, oni bai eu bod yn dewis dosbarthu carcasau buchol (rheoliad 6); nac i weithredwyr lladd-dai lle y mae llai na 500 o foch glân yr wythnos yn cael eu cigydda, ar gyfartaledd bob blwyddyn (rheoliad 12).

Mae'r Rheoliadau'n darparu ar gyfer system drwyddedu i unrhyw un sy'n dosbarthu carcasau buchol drwy edrych arnynt ac ar gyfer trwyddedu lladd-dai sy'n defnyddio offer graddio awtomataidd i ddsbarthu'r carcasau hynny (rheoliadau 8 i 10). Mae torri gofynion y drwydded yn drosedd (rheoliad 29).

Rhaid i waith dosbarthu carcasau moch gael ei wneud drwy ddefnyddio dull graddio a awdurdodwyd a thechnegau graddio a weithredir gan bersonél cymwys (rheoliad 14). Mae torri'r gofyniad hwn yn drosedd (rheoliad 30). Yn lle marcio carcas mochyn, caniateir i weithredwr gadw cofnod o'i ddsbarthiad (rheoliad 15).

Mae'n ofynnol i weithredwyr lladd-dai cymeradwy gadw cofnodion ynglŷn â charcasau buchol a charcasau moch yn eu tro (rheoliadau 11 ac 16 ac Atodlenni 3 a 4).

Mae Rhan 5 o'r Rheoliadau'n ymwneud â gorfodi, ac yn gwneud darpariaeth ynglŷn â phwerau swyddogion awdurdodedig, hysbysiaid gorfodi, hysbysiaid cosb ac achosion troseddol. Mae rheoliadau 20(3) a 26 i 32 yn nodi'r troseddau o dan y Rheoliadau, y gellir cosbi pob un ohonynt ar euogfarn ddiannod â dirwy, ac eithrio troseddau o dan reoliad 31(2) neu (3) (marciau ffug).

Yn benodol, mae rheoliadau 26 a 27 yn darparu bod torri darpariaethau penodedig yn neddfwriaeth yr Undeb Ewropeaidd yn drosedd, sef y darpariaethau eidion Ewropeaidd a nodir yn Atodlen 1 a'r darpariaethau moch Ewropeaidd a nodir yn Atodlen 2. Mae'r darpariaethau a bennir yn Atodlenni 1 a 2 yn cynnwys gofynion ynglŷn â chofnodi a hysbysu prisiau'r farchnad ar gyfer carcasau buchol a charcasau moch yn eu tro.

Ystyriwyd Cod Ymarfer Gweinidogion Cymru ar gynnal Aseidiadau Effaith Rheoleiddiol mewn perthynas â'r Rheoliadau hyn. O ganlyniad, ystyriwyd nad oedd yn angenrheidiol cynnal asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn gan fod y diwygiadau o natur dechnegol.

OFFERYNNAU STATUDOL
CYMRU

2018 Rhif 1215 (Cy. 248)

AMAETHYDDIAETH, CYMRU

**Rheoliadau Dosbarthu Carcasau a
Hysbysu eu Prisiau (Cymru) 2018**

Gwnaed 22 Tachwedd 2018

*Gosodwyd gerbron Cynulliad Cenedlaethol
Cymru* 23 Tachwedd 2018

Yn dod i rym 14 Rhagfyr 2018

Mae Gweinidogion Cymru yn gwneud y Rheoliadau hyn drwy arfer y pwerau a roddir gan adran 2(2) o Ddeddf y Cymunedau Ewropeaidd 1972 a pharagraff 1A o Atodlen 2 iddi⁽¹⁾.

Mae Gweinidogion Cymru wedi eu dynodi⁽²⁾ at ddibenion adran 2(2) o Ddeddf y Cymunedau Ewropeaidd 1972 mewn perthynas â pholisi amaethyddol cyffredin yr Undeb Ewropeaidd.

Mae'r Rheoliadau hyn yn gwneud darpariaeth at ddiben a grybwyllir yn yr adran honno ac mae'n ymddangos i Weinidogion Cymru ei bod yn hwylus dehongli cyfeiriadau at y Rheoliadau a ganlyn fel cyfeiriad at y Rheoliadau hynny fel y'u diwygir o bryd i'w gilydd—

- (a) Rheoliad (EU) Rhif 1308/2013 Senedd Ewrop a'r Cyngor sy'n sefydlu cyd-drefniadaeth ar gyfer y marchnadoedd mewn cynhyrchion amaethyddol⁽³⁾;

(1) 1972 p. 68. Diwygiwyd adran 2(2) gan adran 27(1)(a) o Ddeddf Diwygio Deddfwriaethol a Rheoleiddiol 2006 (p. 51) a chan adran 3(3) o Ddeddf yr Undeb Ewropeaidd (Diwygio) 2008 (p. 7), a Rhan 1 o'r Atodlen iddi. Mewnosodwyd paragraff 1A o Atodlen 2 gan adran 28 o Ddeddf Diwygio Deddfwriaethol a Rheoleiddiol 2006.

(2) O.S. 2010/2690.

(3) OJ Rhif L 347, 20.12.2013, t. 671, fel y'i diwygiwyd ddiwethaf gan Reoliad (EU) Rhif 2017/2393 (OJ Rhif L 350, 29.12.2017, t. 15).

- (b) Rheoliad Dirprwyedig y Comisiwn (EU) Rhif 2017/1182 sy'n cydategu Rheoliad (EU) Rhif 1308/213 Senedd Ewrop a'r Cyngor o ran graddfeydd yr Undeb ar gyfer dosbarthu carcasau eidion, moch a defaid ac o ran hysbysu prisiau marchnad categorïau penodol o garcasau ac anifeiliaid byw(1); ac
- (c) Rheoliad Gweithredu'r Comisiwn (EU) Rhif 2017/1184 sy'n gosod rheolau ar gyfer cymhwysu Rheoliad (EU) Rhif 1308/2013 Senedd Ewrop a'r Cyngor o ran graddfeydd yr Undeb ar gyfer dosbarthu carcasau eidion, moch a defaid ac o ran hysbysu prisiau marchnad categorïau penodol o garcasau ac anifeiliaid byw(2).

RHAN 1

DARPARIAETHAU CYFFREDINOL

Enwi, cymhwyso a chychwyn

1.—(1) Enw'r Rheoliadau hyn yw Rheoliadau Dosbarthu Carcasau a Hysbysu eu Prisiau (Cymru) 2018.

(2) Mae'r Rheoliadau hyn yn gymwys o ran Cymru.

(3) Daw'r Rheoliadau hyn i rym ar 14 Rhagfyr 2018.

Dehongli

2.—(1) Yn y Rheoliadau hyn—

ystyr “anifail buchol llawn-dwF” (“*adult bovine animal*”) yw anifail buchol sy'n wyth mis oed neu ragor;

ystyr “carcas buchol” (“*bovine carcase*”) yw carcass neu hanner carcass anifail buchol llawn-dwF a gigyddwyd ac sy'n dwyn marc iechyd y darperir ar ei gyfer yn Erthygl 5(2) o Reoliad (EC) Rhif 854/2004 Senedd Ewrop a'r Cyngor a Phennod III o Adran 1 o Atodiad 1 iddo, sy'n gosod rheolau penodol ar gyfer trefnu rheolaethau swyddogol ar gynhyrchion sy'n tarddu o anifeiliaid ac a fwriedir ar gyfer eu bwyta gan bobl(3); ac yn y diffiniad hwn—

(a) ystyr “carcas” yw holl gorff anifail a gigyddwyd fel y'i cyflwynir ar ôl ei waedu, ei ddiberfeddu a thynnu ei groen, a

(1) OJ Rhif L 171, 4.7.2017, t. 74.

(2) OJ Rhif L 171, 4.7.2017, t. 103.

(3) OJ Rhif L 139, 30.4.2004, t. 206, fel y'i diwygiwyd ddiwethaf gan Reoliad y Comisiwn (EU) Rhif 2015/2285 (OJ Rhif L 323, 9.12.2015, t. 6).

(b) ystyr “hanner carcass” yw’r cynnyrch a geir drwy wahanu’r carcass yn gymesur drwy ganol pob fertebra gyddfodol, dorsal, meingefnodol a sacrol a thrwy ganol y sternwm a’r symffysis isgiopwbig;

ystyr “carcass mochyn” (“*pig carcass*”) yw corff mochyn glân sydd wedi ei gigydda, wedi ei waedu ac wedi ei ddiberfeddu, yn gyfan ynteu wedi ei rannu ar hyd y llinell ganol;

ystyr “cyfathrebiad rhagnodedig” (“*prescribed communication*”) yw cyfathrebiad o’r canlyniadau dosbarthu yn unol â gofynion Erthygl 1 o Reoliad Gweithredu’r Comisiwn;

ystyr “darpariaeth eidion Ewropeaidd” (“*European beef provision*”) yw darpariaeth a bennir yng ngholofn (2) o Atodlen 1, y disgrifir ei chynnwys yng ngholofn (3) o’r Atodlen honno;

ystyr “darpariaeth moch Ewropeaidd” (“*European pig provision*”) yw darpariaeth a bennir yng ngholofn (2) o Atodlen 2, y disgrifir ei chynnwys yng ngholofn (3) o’r Atodlen honno;

ystyr “dosbarthu” (“*classification*”) yw—

(a) dosbarthu carcassau buchol yn unol â’r darpariaethau eidion Ewropeaidd, neu

(b) dosbarthu carcassau moch yn unol â’r darpariaethau moch Ewropeaidd a rheoliad 14,

yn ôl y digwydd, ac mae termau cytras i’w dehongli yn unol â hynny;

ystyr “gweithredwr” (“*operator*”) yw person sy’n cynnal busnes lladd-dy cymeradwy;

ystyr “lladd-dy cymeradwy” (“*approved slaughterhouse*”) yw sefydliad a ddefnyddir i gigydda anifeiliaid buchol llawn-dwf neu foch, y mae eu cig wedi ei fwriadu ar gyfer ei fwyta gan bobl ac sydd wedi ei gymeradwyo neu wedi ei gymeradwyo’n amodol o dan Erthygl 4 o Reoliad (EC) Rhif 853/2004 Senedd Ewrop a’r Cyngor sy’n gosod rheolau hylendid penodol ar gyfer bwyd sy’n tarddu o anifeiliaid⁽¹⁾;

ystyr “mochyn glân” (“*clean pig*”) yw mochyn sydd heb ei ddefnyddio ar gyfer bridio;

ystyr “Rheoliad Dirprwyedig y Comisiwn” (“*Commission Delegated Regulation*”) yw Rheoliad Dirprwyedig y Comisiwn (EU) Rhif 2017/1182 sy’n cydategu Rheoliad (EU) Rhif 1308/2013 Senedd Ewrop a’r Cyngor o ran graddfeydd yr Undeb ar gyfer dosbarthu carcassau eidion, moch a defaid ac o ran hysbysu prisiau

(1) OJ Rhif L 139, 30.4.2004, t. 55, fel y’i diwygiwyd ddiwethaf gan Reoliad y Comisiwn (EU) Rhif 2017/1981 (OJ Rhif L 285, 1.11.2017, t. 10).

marchnad categorïau penodol o garcasau ac anifeiliaid byw(1);

ystyr “Rheoliad (EU) 2013” (“*Regulation (EU) 2013*”) yw Rheoliad (EU) Rhif 1308/2013 Senedd Ewrop a’r Cyngor sy’n sefydlu cyd-drefniadaeth ar gyfer y marchnadoedd mewn cynhyrchion amaethyddol;(2)

ystyr “Rheoliad Gweithredu’r Comisiwn” (“*Commission Implementing Regulation*”) yw Rheoliad Gweithredu’r Comisiwn (EU) Rhif 2017/1184 sy’n gosod rheolau ar gymhwyso Rheoliad (EU) Rhif 1308/2013 Senedd Ewrop a’r Cyngor o ran graddfeydd yr Undeb ar gyfer dosbarthu carcasau eidion, moch a defaid ac o ran hysbysu prisiau marchnad categorïau penodol o garcasau ac anifeiliaid byw(3);

ystyr “Rheoliadau 2011” (“*the 2011 Regulations*”) yw Rheoliadau Dosbarthu Carcasau Eidion a Moch (Cymru) 2011(4);

ystyr “swyddog awdurdodedig” (“*authorised officer*”) yw person a awdurdodir gan Weinidogion Cymru at ddibenion y Rheoliadau hyn, ond nid yw’n cynnwys person a benodir er mwyn ystyried apêl o dan reoliad 10.

(2) Mae i’r termau eraill a ddefnyddir yn y Rheoliadau hyn ac y defnyddir y termau Saesneg sy’n cyfateb iddynt yn Rheoliad (EU) 2013, Rheoliad Dirprwyedig y Comisiwn neu Reoliad Gweithredu’r Comisiwn, yr ystyron a ddygir gan y termau cyfatebol Saesneg yn y Rheoliadau hynny.

(3) Yn y Rheoliadau hyn, mae unrhyw gyfeiriad at—

- (a) Rheoliad (EU) 2013,
- (b) Rheoliad Dirprwyedig y Comisiwn, neu
- (c) Rheoliad Gweithredu’r Comisiwn,

i’w ddehongli fel cyfeiriad at yr offeryn hwnnw fel y’i diwygir o bryd i’w gilydd.

Darpariaethau trosiannol

3. Mae unrhyw hysbysiad, trwydded, cymeradwyaeth neu awdurdodiad a roddwyd neu a ganiatawyd o dan Reoliadau 2011 ac sy’n effeithiol pan ddaw’r Rheoliadau hyn i rym yn aros mewn grym fel pe baent wedi eu rhoi neu wedi eu caniatáu o dan y Rheoliadau hyn.

(1) OJ Rhif L 171, 4.7.2017, t. 74 .

(2) OJ Rhif L 347, 20.12.2013, t. 671, fel y’i diwygiwyd ddiwethaf gan Reoliad (EU) Rhif 2017/2393 (OJ Rhif L 350, 29.12.2017, t. 15).

(3) OJ Rhif L 171, 4.7.2017, t. 103.

(4) O.S. 2011/1826 (Cy. 198).

Dirymu

4. Mae'r canlynol wedi eu dirymu—

- (a) Rheoliadau 2011; a
- (b) rheoliad 2 o Reoliadau'r Trefniant Cyffredin Sengl ar gyfer Marchnadoedd (Diwygiadau Canlyniadol) (Cymru) 2013(1).

RHAN 2

HYSBYSU GAN WEITHREDWYR

Hysbysu gan weithredwyr

5.—(1) Rhaid i bob person—

- (a) sy'n weithredwr ar y dyddiad y daw'r Rheoliadau hyn i rym, neu
- (b) sy'n dod yn weithredwr ar ddyddiad dilynol,

roi hysbysiad i Weinidogion Cymru o'r manylion a bennir ym mharagraff (3) o fewn 28 diwrnod i'r dyddiad y daw'r Rheoliadau hyn i rym neu o fewn 28 diwrnod i'r dyddiad y daw'r person hwnnw'n weithredwr, yn ôl y digwydd.

(2) Bernir bod person—

- (a) sydd wedi rhoi hysbysiad, neu y barnwyd ei fod wedi rhoi hysbysiad, o dan reoliad 5(1) neu (2) o Reoliadau 2011, a
- (b) y mae'r Rheoliadau hyn yn gymwys iddo yn rhinwedd rheoliad 6 neu 12,

wedi rhoi hysbysiad o dan baragraff (1).

(3) Dyma'r manylion ym mharagraff (1)—

- (a) enw a chyfeiriad llawn y gweithredwr;
- (b) pan fo'r gweithredwr yn bartneriaeth neu'n gydberchnogion, enwau a chyfeiriadau llawn pob un o'r partneriaid neu'r cydberchnogion;
- (c) pan fo'r gweithredwr yn gorff corfforaethol, enw llawn, cyfeiriad swyddfa gofrestredig a rhif cofrestru'r corff; a
- (d) cyfeiriad, rhif teleffon a rhif cymeradwyo'r lladd-dy.

(4) Pan fo unrhyw newid yn digwydd mewn unrhyw un neu ragor o'r manylion a bennir ym mharagraff (3), rhaid i'r gweithredwr, o fewn 28 diwrnod i ddyddiad y newid, roi hysbysiad o fanylion y newid i Weinidogion Cymru.

(5) Pan fo gweithredwr ("G") yn peidio â bod yn weithredwr lladd-dy cymeradwy, rhaid i G, o fewn 10 niwrnod i'r dyddiad y peidiodd â bod yn weithredwr

(1) O.S. 2013/3270 (Cy. 320).

o'r fath, roi hysbysiad i Weinidogion Cymru o'r canlynol—

- (a) y dyddiad y peidiodd â bod yn weithredwr o'r fath; a
- (b) y person (os oes un) sy'n olynu G fel gweithredwr y lladd-dy hwnnw.

(6) Pan fo lladd-dy cymeradwy'n peidio â bod yn lladd-dy o'r fath, rhaid i weithredwr y lladd-dy, o fewn 10 niwrnod i'r dyddiad y peidiodd â bod yn lladd-dy o'r fath, roi hysbysiad i Weinidogion Cymru o'r dyddiad y peidiodd â bod yn lladd-dy o'r fath.

RHAN 3

CARCASAU BUCHOL

Cymhwyso'r Rheoliadau hyn at weithredwyr buchol ar raddfa fach

6.—(1) Nid yw'n ofynnol i weithredwr buchol ar raddfa fach ddsbarthu carcasau buchol.

(2) Nid yw'r Rheoliadau hyn yn gymwys i weithredwr buchol ar raddfa fach nad yw'n dosbarthu carcasau buchol.

(3) Ond, os bydd gweithredwr buchol ar raddfa fach yn dewis dosbarthu carcasau buchol, mae'r Rheoliadau hyn yn gymwys mewn perthynas â'r gweithredwr hwnnw ac mewn perthynas â dosbarthu'r carcasau hynny.

(4) Yn y rheoliad hwn, ystyr "gweithredwr buchol ar raddfa fach" yw gweithredwr lladd-dy cymeradwy lle y mae llai na 150 o anifeiliaid buchol llawn-dwf yn cael eu cigydda bob wythnos, ar gyfartaledd dros flwyddyn.

(5) Ni fernir bod unrhyw weithredwr buchol ar raddfa fach yr oedd yn ofynnol iddo, nes i'r Rheoliadau hyn ddod i rym, ddsbarthu carcasau buchol o dan Reoliadau 2011 wedi dewis gwneud hynny at ddibenion paragraff (3) am y rheswm hwnnw yn unig.

(6) Nid oes dim yn y rheoliad hwn sy'n rhwystro'r Rheoliadau hyn rhag cael eu cymhwyso at weithredwr mewn perthynas â charcasau moch, os oes moch hefyd yn cael eu cigydda yn lladd-dy'r gweithredwr hwnnw.

Awdurdodau cymwys: carcasau buchol

7.—(1) Gweinidogion Cymru yw'r awdurdod cymwys at ddibenion—

- (a) Erthygl 12(2)(b) o Reoliad Dirprwyedig y Comisiwn (darpariaethau ychwanegol ar ddsbarthu drwy dechnegau graddio awtomataidd);

- (b) Erthyglau 13 a 14 o Reoliad Dirprwyedig y Comisiwn ac Erthygl 14 o Reoliad Gweithredu'r Comisiwn (hysbysu prisiau'r farchnad a chyfrifo pris cyfartalog pob dosbarth);
- (c) Erthygl 17(2) o Reoliad Dirprwyedig y Comisiwn (darpariaethau atodol ar hysbysu prisiau marchnad carcasau);
- (d) Erthygl 4(1) o Reoliad Gweithredu'r Comisiwn (gwneud a chadw adroddiadau ar gyfer gwiriadau yn y fan a'r lle).

(2) Gweinidogion Cymru sy'n gyfrifol am y canlynol—

- (a) Erthygl 10 o Reoliad Dirprwyedig y Comisiwn (awdurdodi dulliau graddio awtomataidd);
- (b) Erthygl 25 o Reoliad Dirprwyedig y Comisiwn (hysbysu'r Comisiwn);
- (c) gwiriadau yn y fan a'r lle, yn unol â'r disgrifiad o "on-the-spot checks" yn Erthyglau 2 a 3 o Reoliad Gweithredu'r Comisiwn.

Trwydded i ymgymryd â dosbarthu

8.—(1) Caiff Gweinidogion Cymru ganiatáu trwydded i ymgymryd â dosbarthu carcasau buchol drwy edrych arnynt i unrhyw berson sy'n gwneud cais am drwydded o'r fath ac sy'n ymddangos i Weiniogion Cymru ei fod yn gymwys i ymgymryd â'r dosbarthu, os yw Gweinidogion Cymru wedi eu bodloni bod y ceisydd yn berson addas a phriodol i ymgymryd â dosbarthu carcasau buchol.

(2) Caniateir i'r drwydded gael ei rhoi yn ddarostyngedig i unrhyw delerau ac amodau y mae Gweinidogion Cymru'n ystyried eu bod yn angenrheidiol at ddibenion paragraff (1).

(3) Yn ychwanegol at y pŵer i ddirymu trwydded yn yr amgylchiadau a grybwyllir yn Erthygl 4(2) o Reoliad Gweithredu'r Comisiwn (dosbarthiadau, cyflwyniadau neu adnabyddiadau anghywir), caiff Gweinidogion Cymru atal dros dro neu ddirymu trwydded a ganiatawyd i berson o dan y rheoliad hwn—

- (a) os yw'r person wedi torri unrhyw un neu ragor o delerau neu amodau'r drwydded honno; neu
- (b) os yw Gweinidogion Cymru wedi eu bodloni nad yw'r person sy'n dal y drwydded honno yn berson addas a phriodol mwyach i ymgymryd â dosbarthu carcasau buchol.

(4) Pan fo Gweinidogion Cymru'n gwneud unrhyw benderfyniad mewn perthynas â thrwydded o dan y

rheoliad hwn, a'r penderfyniad hwnnw'n ysgogi hawl i apelio o dan reoliad 10, rhaid i Weinidogion Cymru—

- (a) hysbysu'r person am y penderfyniad mewn ysgrifen;
- (b) rhoi'r rhesymau; ac
- (c) esbonio bod yna hawl i apelio i berson a benodir gan Weinidogion Cymru.

Trwydded ar gyfer graddio awtomataidd

9.—(1) Caiff Gweinidogion Cymru ganiatáu trwydded i weithredwr lladd-dy cymeradwy i awdurdodi defnyddio offer graddio awtomataidd i ddosbarthu carcasau buchol yn y lladd-dy hwnnw, os yw Gweinidogion Cymru wedi eu bodloni y byddai'r offer a'i ddull gweithredu yn bodloni'r safonau sy'n ofynnol gan Erthyglau 9(b) a 10(2) (o'u darllen gyda Rhan A o Atodiad IV) o Reoliad Dirprwyedig y Comisiwn.

(2) Caniateir i'r drwydded gael ei rhoi yn ddarostyngedig i unrhyw delerau ac amodau y mae eu hangen er mwyn sicrhau y cydymffurfir â'r safonau hynny.

(3) Yn ychwanegol at y pŵer i ddirymu trwydded yn yr amgylchiadau a grybwyllir yn Erthygl 4(2) o Reoliad Gweithredu'r Comisiwn, caiff Gweinidogion Cymru atal dros dro neu ddirymu trwydded a ganiatawyd i weithredwr o dan y rheoliad hwn—

- (a) os yw'r gweithredwr wedi torri unrhyw un neu ragor o delerau neu amodau'r drwydded; neu
- (b) os yw Gweinidogion Cymru yn ystyried nad yw'r offer graddio awtomataidd mwyach yn bodloni'r safonau sy'n ofynnol gan Reoliad Dirprwyedig y Comisiwn, pa un ai am resymau sy'n gysylltiedig â'r offer ei hun neu'r modd y defnyddir yr offer gan y gweithredwr.

(4) Pan fo Gweinidogion Cymru'n gwneud unrhyw benderfyniad mewn perthynas â thrwydded o dan y rheoliad hwn, a'r penderfyniad hwnnw'n ysgogi hawl i apelio o dan reoliad 10, rhaid i Weinidogion Cymru—

- (a) hysbysu'r person am y penderfyniad mewn ysgrifen;
- (b) rhoi'r rhesymau; ac
- (c) esbonio bod yna hawl i apelio i berson a benodir gan Weinidogion Cymru.

Apelau ynghylch trwyddedau

10.—(1) Caniateir i berson apelio yn erbyn—

- (a) penderfyniad gan Weinidogion Cymru i wrthod cais gan y person hwnnw am drwydded o dan reoliad 8 neu 9;
- (b) teler neu amod a osodwyd gan Weinidogion Cymru mewn trwydded a ganiatawyd i'r person hwnnw o dan reoliad 8 neu 9; neu
- (c) penderfyniad gan Weinidogion Cymru i atal dros dro neu ddirymu trwydded o dan reoliad 8 neu 9.

(2) Rhaid i'r apêl gael ei gwneud i berson a benodir at y diben gan Weinidogion Cymru.

(3) Caiff Gweinidogion Cymru hefyd gyflwyno sylwadau ysgrifenedig i'r person a benodir ynglŷn â'r penderfyniad.

(4) Rhaid i'r person a benodir ystyried yr apêl ac unrhyw sylwadau a gyflwynir gan Weinidogion Cymru, a rhaid iddo gyflwyno adroddiad ysgrifenedig i Weinidogion Cymru gyda'i gasgliadau ar yr apêl ac argymhelliad ar sut y dylai'r mater gael ei benderfynu'n derfynol gan Weinidogion Cymru.

(5) Wedyn rhaid i Weinidogion Cymru gyrraedd penderfyniad terfynol, a hysbysu'r person a wnaeth yr apêl am y penderfyniad hwnnw a'r rhesymau drosto.

Cofnodion: carcasau buchol

11.—(1) Rhaid i weithredwr lladd-dy cymeradwy gadw cofnod o'r manylion a bennir yn Atodlen 3 ynglŷn â phob carcass buchol a ddosberthir yn y lladd-dy hwnnw.

(2) Rhaid i'r gweithredwr ddal gafael ar bob cofnod am gyfnod o 12 mis o ddiwedd y flwyddyn galendr y mae'r cofnod yn berthynol iddi.

RHAN 4

CARCASAU MOCH

Esemptiad i weithredwyr moch ar raddfa fach

12.—(1) Nid yw'r Rheoliadau hyn yn gymwys i weithredwr lladd-dy cymeradwy lle y mae llai na 500 o foch glân yn cael eu cigydda bob wythnos, ar gyfartaledd dros flwyddyn.

(2) Nid oes dim ym mharagraff (1) sy'n rhwystro'r Rheoliadau hyn rhag cael eu cymhwyso at weithredwr mewn perthynas â charcasau buchol, os oes anifeiliaid buchol llawn-dwf hefyd yn cael eu cigydda yn lladd-dy'r gweithredwr hwnnw.

Awdurdod cymwys: carcasau moch

13.—(1) Gweinidogion Cymru yw'r awdurdod cymwys at ddibenion y canlynol—

- (a) Erthygl 7(4) o Reoliad Dirprwyedig y Comisiwn (dosbarthu a phwyso);
- (b) Erthygl 12(2)(b) o Reoliad Dirprwyedig y Comisiwn (darpariaethau ychwanegol ar ddosbarthu drwy dechnegau graddio awtomataidd);
- (c) Erthyglau 13 a 14 o Reoliad Dirprwyedig y Comisiwn ac Erthygl 14 o Reoliad Gweithredu'r Comisiwn (hysbysu prisiau'r farchnad a chyfrifo pris cyfartalog pob dosbarth);
- (d) Erthygl 17(2) o Reoliad Dirprwyedig y Comisiwn (darpariaethau atodol ar hysbysu prisiau marchnad carcasau);
- (e) Erthygl 4(1) o Reoliad Gweithredu'r Comisiwn (gwneud a chadw adroddiadau ar gyfer gwiriadau yn y fan a'r lle).
- (f) Gweinidogion Cymru sy'n gyfrifol am y canlynol—
- (g) Erthygl 11 o Reoliad Dirprwyedig y Comisiwn (awdurdodi dulliau graddio awtomataidd);
- (h) Erthygl 25 o Reoliad Dirprwyedig y Comisiwn (hysbysu'r Comisiwn);
- (i) gwiriadau yn y fan a'r lle, yn unol â'r disgrifiad o “on-the-spot checks” yn Erthyglau 2 a 3 o Reoliad Gweithredu'r Comisiwn.

Dulliau graddio awdurdodedig

14.—(1) Rhaid ymgymryd â dosbarthu carcasau moch mewn lladd-dy cymeradwy—

- (a) drwy ddefnyddio dull graddio awdurdodedig y darperir ar ei gyfer yn Erthygl 11 o Reoliad Dirprwyedig y Comisiwn; a
- (b) drwy ddefnyddio technegau graddio y darperir ar eu cyfer yn Erthygl 11 o Reoliad Dirprwyedig y Comisiwn a'r rheiny'n cael eu gweithredu gan bersonél cymwys.

(2) Yn y rheoliad hwn, mae “personél cymwys” yn cyfeirio at unrhyw berson sy'n hyfedr wrth ddefnyddio'r offer a'r technegau graddio sy'n cael eu gweithredu gan y person hwnnw.

Cofnodion yn lle marcio

15. Caiff gweithredwr neu'r person sy'n gyfrifol am ddosbarthu moch, yn hytrach na marcio carcas yn unol â'r darpariaethau moch Ewropeaidd a nodir yn Rhan 2 o Atodlen 2, lunio cofnod ar gyfer y carcas hwnnw sy'n cynnwys o leiaf—

- (a) modd i adnabod y carcass yn unigol drwy unrhyw ddull nad oes modd ei newid;
- (b) pwysau cynnes y carcass; ac
- (c) canlyniad y dosbarthiad.

Cofnodion: carcassau moch

16.—(1) Rhaid i weithredwr lladd-dy cymeradwy gadw cofnod o'r manylion a bennir yn Atodlen 4 ynglŷn â phob carcass mochyn a ddsberthir yn y lladd-dy hwnnw.

(2) Rhaid i'r gweithredwr ddal gafael ar bob cofnod am gyfnod o 12 mis o ddiwedd y flwyddyn galendr y mae'r cofnod yn berthynol iddi.

RHAN 5

GORFODI A THROSEDDAU

Hysbysiadau

17.—(1) Rhaid i unrhyw hysbysiad y mae'n ofynnol ei roi, neu yr awdurdodir ei roi, i unrhyw berson o dan y Rheoliadau hyn fod mewn ysgrifen.

(2) Caniateir i unrhyw hysbysiad o'r fath gael ei roi—

- (a) drwy ei drosglwyddo i'r person;
- (b) drwy ei adael yng nghyfeiriad priodol y person; neu
- (c) drwy ei anfon drwy'r post at y person yn y cyfeiriad hwnnw.

(3) Pan fo unrhyw hysbysiad o'r fath i gael ei roi i gorff corfforaethol, caniateir iddo gael ei roi i un o swyddogion y corff.

(4) At ddiben y rheoliad hwn, cyfeiriad priodol unrhyw berson y mae hysbysiad i gael ei roi iddo yw cyfeiriad hysbys olaf y person hwnnw, ac eithrio mai'r cyfeiriad priodol, yn achos corff corfforaethol neu un o swyddogion y corff, yw cyfeiriad swyddfa gofrestredig neu brif swyddfa'r corff hwnnw.

(5) Yn y rheoliad hwn—

ystyr “cyfarwyddwr” (“*director*”), mewn perthynas â chorff corfforaethol y rheolir ei faterion gan ei aelodau, yw aelod o'r corff corfforaethol; ac

ystyr “swyddog” (“*officer*”), mewn perthynas â chorff corfforaethol, yw unrhyw gyfarwyddwr, rheolwr, ysgrifennydd neu swyddog cyffelyb arall i'r corff corfforaethol.

Pwerau mynediad

18.—(1) Caiff swyddog awdurdodedig, ar unrhyw adeg resymol ac, os gofynnir iddo, ar ôl dangos awdurdodiad a ddilyswyd yn briodol, fynd i mewn i ladd-dy cymeradwy ac unrhyw fangre gysylltiedig, lle y gall carcasau fod yn cael eu trin, neu lle y gall cofnodion ynglŷn â'r carcasau hynny fod yn cael eu cadw, er mwyn canfod—

- (a) a oes unrhyw drosedd o dan y Rheoliadau hyn yn cael, neu wedi cael, ei chyflawni yn y fangre; neu
- (b) a oes unrhyw dystiolaeth yn y fangre o unrhyw drosedd o'r fath.

(2) Caiff y swyddog fynd ag unrhyw bersonau eraill y mae'n credu eu bod yn angenrheidiol gydag ef.

(3) Caiff ynad heddwch, drwy warant wedi ei llofnodi, ganiatáu i swyddog awdurdodedig fynd i mewn i unrhyw fangre, drwy rym rhesymol os bydd angen hynny, os yw wedi ei fodloni ar sail gwybodaeth ysgrifenedig a roddir ar lw—

- (a) bod sail resymol dros fynd i mewn i'r fangre at unrhyw ddiben ym mharagraff (1); a
- (b) bod unrhyw un neu ragor o'r amodau a ganlyn wedi eu bodloni—
 - (i) bod mynediad i'r fangre wedi ei wrthod, neu y rhagwelir y caiff ei wrthod, ac (yn y naill achos neu'r llall) fod hysbysiad o'r bwriad i wneud cais am warant wedi ei roi i'r gweithredwr;
 - (ii) y byddai gwneud cais am fynediad, neu roi hysbysiad o'r fath, yn tansilio'r diben o fynd i mewn;
 - (iii) bod yr achos yn achos brys; neu
 - (iv) bod y fangre'n wag neu fod y gweithredwr yn absennol dros dro,

(4) Mae gwarant a ganiateir o dan y rheoliad hwn yn parhau mewn grym am dri mis.

(5) Rhaid i swyddog sy'n mynd i mewn i unrhyw fangre wag, neu fangre sydd â'i gweithredwr yn absennol dros dro, adael y fangre wedi ei diogelu mor effeithiol rhag mynediad diawdurdod ag yr oedd cyn i'r swyddog fynd i mewn.

Pwerau swyddogion awdurdodedig

19. Caiff swyddog awdurdodedig sy'n mynd i mewn i fangre o dan y Rheoliadau hyn—

- (a) arolygu unrhyw garcas buchol neu garcas mochyn neu ran o garcas o'r fath, neu unrhyw garcas neu ran o garcas y mae'r swyddog yn amau'n rhesymol ei fod yn garcas buchol neu garcas mochyn neu ran o garcas o'r fath;

- (b) archwilio unrhyw gofnod y mae'n ofynnol i weithredwr ei gadw o dan reoliad 11 neu 16 neu o dan Reoliad Dirprwyedig y Comisiwn neu Reoliad Gweithredu'r Comisiwn, a phan ddefnyddir cyfrifiadur i gadw'r cofnod hwnnw, cael mynediad i unrhyw gyfrifiadur a chyfarpar neu ddeunydd cysylltiedig, a ddefnyddir neu a ddefnyddiwyd mewn cysylltiad â'r cofnod hwnnw, ac arolygu a gwirio gweithrediad y cyfryw gyfrifiadur a chyfarpar neu ddeunydd cysylltiedig;
- (c) ei gwneud yn ofynnol i gopïau neu ddarnau o unrhyw gofnod o'r fath gael eu dangos a, pan ddefnyddir cyfrifiadur i gadw'r cofnod hwnnw, ei gwneud yn ofynnol i'r cofnod gael ei ddangos ar ffurf a fydd yn caniatáu iddo gael ei gludo ymaith; a
- (d) dal gafael ar unrhyw gofnod o'r fath y mae gan y swyddog reswm dros gredu y gall fod yn angenrheidiol fel tystiolaeth mewn achos o dan y Rheoliadau hyn.

Hysbysiadau gorfodi

20.—(1) Os oes gan Weinidogion Cymru reswm dros gredu bod person wedi cyflawni trosedd o dan y Rheoliadau hyn, caiff Gweinidogion Cymru roi hysbysiad gorfodi i'r person hwnnw yn unol â pharagraff (2).

(2) Rhaid i hysbysiad gorfodi—

- (a) datgan ar ba sail y mae Gweinidogion Cymru'n credu bod trosedd wedi ei chyflawni;
- (b) pennu'r mater sy'n cyfansoddi'r drosedd;
- (c) pennu'r hyn y mae'n rhaid i'r person hwnnw beidio â'i wneud, neu'r mesurau y mae'n rhaid, ym marn Gweinidogion Cymru, i'r person hwnnw eu cymryd er mwyn cydymffurfio â'r Rheoliadau hyn;
- (d) ei gwneud yn ofynnol i'r person beidio â chyflawni'r weithred a bennir yn yr hysbysiad, neu gymryd y mesurau a bennir yn yr hysbysiad, neu fesurau sydd o leiaf yn gyfwerth â'r rheiny, o fewn y cyfnod (nad yw'n llai na 14 diwrnod) a bennir yn yr hysbysiad;
- (e) hysbysu'r person am yr hawl i apelio a roddir gan reoliad 21; ac
- (f) hysbysu'r person o fewn pa gyfnod y caniateir i apel o'r fath gael ei gwneud.

(3) Mae unrhyw berson sy'n torri hysbysiad gorfodi neu'n methu â chydymffurfio ag ef yn euog o drosedd.

Apelau yn erbyn hysbysiadau gorfodi

21.—(1) Caiff person apelio i lys ynadon yn erbyn hysbysiad gorfodi os oes gan y person hwnnw reswm dros gredu na ddylai'r hysbysiad fod wedi ei roi.

(2) Caiff person apelio o fewn y cyfnod o un mis sy'n cychwyn gyda'r dyddiad y rhoddwyd yr hysbysiad.

(3) Y weithdrefn a ddilynir yw gwneud cwyn am orchymyn; a bydd Deddf Llysoedd Ynadon 1980(1) yn gymwys i'r achos.

(4) Ar apêl, caiff y llys naill ai ddiddymu'r hysbysiad neu ei gadarnhau, ac os bydd yn ei gadarnhau caiff wneud hynny naill ai yn ei ffurf wreiddiol neu gyda pha addasiadau bynnag y mae'r llys yn meddwl eu bod yn briodol.

Hysbysiadau cosb

22.—(1) Os oes gan Weinidogion Cymru reswm dros gredu bod person wedi cyflawni trosedd o dan y Rheoliadau hyn, caiff Gweinidogion Cymru roi hysbysiad (“hysbysiad cosb”) i'r person hwnnw yn unol â pharagraffau (2) a (3).

(2) Caiff hysbysiad cosb fod am unrhyw swm.

(3) Rhaid i hysbysiad cosb—

- (a) rhoi unrhyw fanylion am amgylchiadau'r drosedd honedig sy'n angenrheidiol i roi gwybodaeth resymol am y drosedd;
- (b) datgan swm y gosb;
- (c) datgan yn ystod pa gyfnod, yn rhinwedd rheoliad 23, na chychwynir achos ynglŷn â'r drosedd;
- (d) datgan i ba berson ac ym mha gyfeiriad y gellir talu'r gosb; ac
- (e) datgan ym mha fodd y caniateir i'r taliad gael ei wneud.

Cyfyngiad ar ddwyn achos am drosedd cosb

23.—(1) Pan fo hysbysiad cosb wedi ei roi i berson—

- (a) ni chaniateir dwyn achos yn erbyn y person hwnnw am y drosedd y mae'r hysbysiad yn ymwneud â hi cyn diwedd y cyfnod o 28 diwrnod sy'n cychwyn ar y dyddiad y rhoddwyd yr hysbysiad; a
- (b) ni chaniateir euogfarnu'r person hwnnw am y drosedd os telir y gosb yn unol â rheoliad 24 cyn diwedd y cyfnod hwnnw.

(1) 1980 p. 43; amnewidiwyd adrannau 51 a 52 gan Ddeddf Llysoedd 2003 (p. 39), adran 47.

(2) Nid yw paragraff (1) yn gymwys os tynnir yr hysbysiad cosb yn ôl yn unol â rheoliad 25.

Talu'r gosb

24.—(1) Rhaid talu unrhyw gosb i Weinidogion Cymru drwy ei hanfon drwy'r post neu drwy unrhyw ddull a bennir yn yr hysbysiad cosb.

(2) Mewn unrhyw achos, bydd tystysgrif yr honnir ei bod wedi ei llofnodi gan Weinidogion Cymru neu ar eu rhan yn datgan bod taliad o gosb wedi ei gael neu heb ei gael erbyn y dyddiad a bennir yn y dystysgrif yn dystiolaeth o'r ffeithiau a ddatgenir.

Tynnu hysbysiad cosb yn ôl

25.—(1) Caniateir i hysbysiad cosb gael ei dynnu'n ôl os oes gan Weinidogion Cymru reswm dros gredu na ddylai fod wedi ei roi (pa un ai i'r person a enwyd yn yr hysbysiad cosb, neu fel arall).

(2) Caniateir i hysbysiad cosb gael ei dynnu'n ôl gan Weinidogion Cymru drwy roi hysbysiad i'r person a enwyd yn yr hysbysiad cosb cyn i'r gosb gael ei thalu neu ar ôl i'r gosb gael ei thalu.

(3) Pan dynnir hysbysiad cosb yn ôl, rhaid i Weinidogion Cymru ad-dalu unrhyw gosb a dalwyd o dan yr hysbysiad cosb i'r person a enwyd yn yr hysbysiad cosb o fewn 28 diwrnod, gan gychwyn gyda'r dyddiad yr anfonwyd yr hysbysiad bod yr hysbysiad cosb wedi ei dynnu'n ôl.

Troseddau: darpariaethau eidion Ewropeaidd

26. Mae unrhyw berson sydd—

- (a) yn methu â chydymffurfio ag unrhyw ofyniad o dan ddarpariaeth eidion Ewropeaidd; neu
- (b) yn torri unrhyw waharddiad a gynhwysir mewn darpariaeth eidion Ewropeaidd,
- (c) yn euog o drosedd.

Troseddau: darpariaethau moch Ewropeaidd

27.—(1) Mae unrhyw berson sydd—

- (a) yn methu â chydymffurfio ag unrhyw ofyniad o dan ddarpariaeth moch Ewropeaidd; neu
- (b) yn torri unrhyw waharddiad a gynhwysir mewn darpariaeth moch Ewropeaidd,

yn euog o drosedd.

(2) Ond pan fydd gweithredwr neu'r person sy'n gyfrifol am ddsbarthu carcassau moch yn llunio cofnod gan gydymffurfio â'r amodau y cyfeirir atynt yn rheoliad 15 (cofnodion yn lle marcio) ni chyflawnir trosedd drwy fethu â chydymffurfio â darpariaeth moch Ewropeaidd Rhan 2 neu drwy ei thorri.

(3) Yn y rheoliad hwn, ystyr, “darpariaeth moch Ewropeaidd Rhan 2” yw darpariaeth a bennir yng ngholofn (2) o Ran 2 o Atodlen 2.

Troseddau: hysbysiadau gan weithredwyr

28. Mae unrhyw berson sy'n methu â chydymffurfio ag unrhyw un neu ragor o ofynion rheoliad 5 (hysbysiadau gan weithredwyr) yn euog o drosedd.

Troseddau: trwyddedau (carcasau buchol)

29.—(1) Os ymgwymerir â dosbarthu carcas buchol mewn lladd-dy cymeradwy—

- (a) heb drwydded a ganiatawyd o dan reoliad 8, neu
- (b) gan dorri unrhyw un neu ragor o amodau neu delerau trwydded o'r fath,

mae'r person sy'n ymgymryd â'r dosbarthu a gweithredwr y lladd-dy hwnnw ill dau'n euog o drosedd.

(2) Os ymgwymerir â dosbarthu carcas buchol mewn lladd-dy cymeradwy drwy ddefnyddio offer graddio awtomataidd—

- (a) heb drwydded a ganiatawyd o dan reoliad 9 i ddefnyddio'r offer hwnnw yn y lladd-dy hwnnw, neu
- (b) gan dorri unrhyw un neu ragor o amodau neu delerau trwydded o'r fath,

mae'r person sy'n ymgymryd â'r dosbarthu hwnnw a gweithredwr y lladd-dy hwnnw ill dau'n euog o drosedd.

(3) Mae unrhyw berson sy'n gwneud newid mewn trwydded a ganiatawyd o dan reoliad 8 neu 9 yn euog o drosedd.

Troseddau: dulliau graddio awdurdodedig (carcasau moch)

30. Os ymgwymerir â dosbarthu carcas mochyn mewn lladd-dy cymeradwy drwy ddefnyddio dull graddio neu dechneg graddio mewn modd nad yw'n cydymffurfio â gofynion rheoliad 14, mae'r person sy'n ymgymryd â'r dosbarthu a gweithredwr y lladd-dy hwnnw ill dau'n euog o drosedd.

Troseddau: cofnodion a marciau

31.—(1) Mae unrhyw berson sy'n methu â chydymffurfio ag unrhyw un neu ragor o ofynion rheoliad 11 (cofnodion: carcasau buchol) neu reoliad 16 (cofnodion: carcasau moch) yn euog o drosedd.

(2) Mae unrhyw berson sy'n marcio carcas buchol neu ran o garcas o'r fath—

- (a) fel y rhagnodir gan Erthygl 8(1), (2)(a), (3)(a) (o'u darllen gydag ail baragraff Erthygl 8(3)), (4) a (5) o Reoliad Dirprwyedig y Comisiwn, neu
- (b) mewn modd sy'n debyg iawn i'r marc a ragnodir yn y darpariaethau hynny,

sy'n debygol o gamarwain, yn euog o drosedd.

(3) Mae unrhyw berson sy'n marcio carcass mochyn neu ran o garcas o'r fath—

- (a) fel y rhagnodir gan Erthygl 8(1), (2)(b), (3)(c) (o'u darllen gydag ail baragraff Erthygl 8(3)), (4) a (5) o Reoliad Dirprwyedig y Comisiwn, neu
- (b) mewn modd sy'n debyg iawn i'r marc a ragnodir yn y darpariaethau hynny,

sy'n debygol o gamarwain, yn euog o drosedd.

Troseddau: rhwystro etc.

32. Mae unrhyw berson—

- (a) sydd heb esgus rhesymol, yn rhwystro unrhyw berson sy'n gweithredu o dan y Rheoliadau hyn,
- (b) sydd heb achos rhesymol, yn methu â rhoi i unrhyw berson sy'n gweithredu o dan y Rheoliadau hyn unrhyw gymorth neu wybodaeth y mae'r person hwnnw yn rhesymol yn ei gwneud yn ofynnol er mwyn cyflawni swyddogaethau o dan y Rheoliadau hyn,
- (c) sy'n rhoi i unrhyw berson sy'n gweithredu o dan y Rheoliadau hyn unrhyw wybodaeth gan wybod ei bod yn ffug neu'n gamarweiniol, neu
- (d) sy'n methu â dangos unrhyw ddogfen neu gofnod pan fo unrhyw berson sy'n gweithredu o dan y Rheoliadau hyn yn ei gwneud yn ofynnol iddo wneud hynny,

yn euog o drosedd.

Y cyfnod ar gyfer dwyn erlyniad

33.—(1) Caniateir i achos am drosedd o dan reoliadau 20(3), 26, 27, 28, 29, 30, 31(1) neu 32 gael ei ddwyn o fewn cyfnod o 12 mis o'r dyddiad y daeth yr erlynydd i wybod gyntaf am dystiolaeth ddigonol, ym marn yr erlynydd, i gyfiawnhau achos.

(2) Ond ni chaniateir i achos o'r fath gael ei ddwyn ymhén mwy na 18 mis ers i'r drosedd gael ei chyflawni.

(3) At ddibenion paragraff (1)—

- (a) mae tystysgrif a lofnodwyd gan yr erlynydd neu ar ei ran ac sy'n datgan y dyddiad y daeth

yr erlynydd i wybod gyntaf am dystiolaeth ddigonol i gyfiawnhau'r achos yn dystiolaeth derfynol o'r ffaith honno;

- (b) bernir bod tystysgrif sy'n datgan y mater ac sy'n honni ei bod wedi ei llofnodi felly wedi ei llofnodi felly, oni phrofir i'r gwrthwyneb.

Troseddau gan gyrff corfforaethol

34.—(1) Os profir bod trosedd o dan y Rheoliadau hyn a gyflawnwyd gan gorff corfforaethol wedi ei chyflawni drwy gydsyniad neu ymoddefiad swyddog, neu i'w phriodoli i unrhyw esgeulustod ar ran swyddog, mae'r swyddog hwnnw yn ogystal â'r corff corfforaethol yn euog o'r drosedd ac yn agored i'w erlyn a'i gosbi yn unol â hynny.

(2) Pan fo materion corff corfforaethol yn cael eu rheoli gan ei aelodau, mae paragraff (1) yn gymwys mewn perthynas â gweithredoedd ac anweithredoedd aelod, mewn cysylltiad â swyddogaethau'r aelod hwnnw o reoli, fel pe bai'r aelod hwnnw'n gyfarwyddwr i'r corff.

(3) Yn y rheoliad hwn, ystyr "swyddog" mewn perthynas â chorff corfforaethol yw cyfarwyddwr, aelod o'r pwyllgor rheoli, prif weithredwr, rheolwr, ysgrifennydd neu swyddog cyffelyb arall i'r corff, neu berson sy'n honni gweithredu mewn unrhyw swydd o'r fath.

Amddiffyniad diwydrwydd dyladwy

35. Mae'n amddiffyniad os gall person a gyhuddir o drosedd o dan y Rheoliadau hyn ("P"), profi bod P wedi cymryd pob rhagofal rhesymol ac wedi arfer pob diwydrwydd dyladwy i osgoi cyflawni'r drosedd gan P neu gan berson o dan reolaeth P.

Troseddau: cosbi

36.—(1) Mae person sy'n euog o drosedd o dan y canlynol—

- (a) rheoliad 20(3) (hysbysiadau gorfodi),
- (b) rheoliad 26 (darpariaethau eidion Ewropeaidd),
- (c) rheoliad 27 (darpariaethau moch Ewropeaidd),
- (d) rheoliad 28 (hysbysiadau gan weithredwyr),
- (e) rheoliad 29 (trwyddedau (carcasau buchol)),
- (f) rheoliad 30 (dulliau graddio awdurdodedig: (carcasau moch)),
- (g) rheoliad 31(1) (cofnodion), neu
- (h) rheoliad 32 (rhwystro etc.),

yn agored, o'i euogfarnu'n ddiannod, i ddirwy.

(2) Mae person sy'n euog o drosedd o dan reoliad
31(2) neu (3) (marciau camarweiniol etc.) yn agored—

- (a) o'i euogfarnu'n ddiannod, i ddirwy; neu
- (b) o'i euogfarnu ar dditiad, i ddirwy.

Lesley Griffiths

Ysgrifennydd y Cabinet dros Ynni, Cynllunio a
Materion Gwledig, un o Weinidogion Cymru
22 Tachwedd 2018

ATODLEN 1 Rheoliad 2

Darpariaethau Ewropeaidd: carcasau
buchol

<i>(1) Y Rheoliad sy'n cynnwys y ddarpariaeth Ewropeaidd</i>	<i>(2) Y ddarpariaeth</i>	<i>(3) Y cynnwys</i>
Rheoliad (EU) 2013	Erthygl 10 ac Atodiad IV, pwynt A(II), ynghyd ag Erthygl 1 o Reoliad Dirprwyedig y Comisiwn (o'u darllen gyda Rheoliadau Adnabod Gwartheg (Cymru) 2007 ⁽¹⁾)	Gofyniad i ddynodi categori'r carcas fel y'i pennir yn y darpariaethau hyn
	Erthygl 10 ac Atodiad IV, pwynt A(III), ynghyd ag Erthygl 3(1) o Reoliad Dirprwyedig y Comisiwn, ac Atodiad 1 iddo	Gofyniad i ddynodi, mewn perthynas â charcas, dosbarth y cydffurfiad a'r gorchudd braster fel y'i pennir yn y darpariaethau hyn
	Erthygl 10 ac Atodiad IV, pwynt A(IV)	Gofyniad i gyflwyno carcasau yn y dull penodedig
	Erthygl 10 ac Atodiad IV, pwynt A(V), yr is-baragraff cyntaf	Gofyniad i ladd-dai cymeradwy ddosbarthu a nodi carcasau yn unol â graddfa'r Undeb
Rheoliad Dirprwyedig y	Erthygl 6(1)	Gwahardd tynnu braster,

(1) O.S. 2007/842 (Cy. 74). Mae Rheoliadau Adnabod Gwartheg (Cymru) 2007 yn sefydlu system adnabod a chofrestru anifeiliaid buchol yng Nghymru, fel y'i pennir yn Erthygl 1 o Reoliad (EU) 2013.

Comisiwn	cyhyr neu feinwe arall cyn pwyso, graddio a marcio
Erthygl 6(3)	Gofyniad i gyflwyno'r carcas yn y dull penodedig, er mwyn canfod prisiau'r farchnad
Erthygl 7(1)	Gofyniad ynghylch lle ac amser y dosbarthu
Erthygl 7(3)(a)	Gofynion ynghylch amser y dosbarthu a'r pwyso
Erthygl 7(5)	Gofyniad ynghylch amser y dosbarthu mewn achosion lle y mae dull graddio awtomataidd yn methu dosbarthu carcas
Erthygl 8(1), 8(2)(a), Erthygl 8(3)(a) o'u darllen gydag ail baragraff yr Erthygl honno, Erthygl 8(4)	Gofynion ynghylch marcio carcasau i ddynodi categori a dosbarth y cydffurfiad a'r gorchudd braster
Erthygl 8(5)	Gofynion mewn perthynas â labelu carcas
Erthygl 10(7)	Gwahardd addasu manylebau technegol dulliau graddio awtomataidd awdurdodedig heb gymeradwyaeth Gweinidogion Cymru

	Erthygl 12	Gofynion ynghylch dosbarthu drwy dechnegau graddio awtomataidd
	Erthygl 14(1), (2) a (3)	Gofyniad ynghylch pwyso'r carcass er mwyn hysbysu prisiau'r farchnad
	Erthygl 14(4)	Gofynion ynghylch hysbysu prisiau fesul dosbarth
	Erthygl 17(2) o ran y modd y'i cymhwysir at daliadau atodol am garcasau	Gofynion ynghylch hysbysu unrhyw daliadau atodol
Rheoliad Gweithredu'r Comisiwn	Erthygl 1	Gofynion ynghylch y cyfathrebiad rhagnodedig
	Is-baragraffau un a thri o Erthygl 5(1) a'r Atodiad	Gofynion ynghylch addasiadau i bwysau'r carcass
	Erthygl 7	Gofyniad ynghylch dosbarthiadau ar gyfer cofnodi prisiau marchnad carcasau eidion
	Erthygl 8(1), (3) a (4)	Gofyniad ynghylch cofnodi prisiau'r farchnad

ATODLEN 2 Rheoliadau 2, 15 a 27

Darpariaeth Ewropeaidd: carcasau moch

RHAN 1

<i>(1) Y Rheoliad sy'n cynnwys y ddarpariaeth Ewropeaidd</i>	<i>(2) Y ddarpariaeth</i>	<i>(3) Y cynnwys</i>
Rheoliad (EU) 2013	Erthygl 10 ac Atodiad IV, pwynt B(II)	Gofyniad i ddsbarthu carcasau i un o'r dosbarthiadau penodedig
	Erthygl 10 ac Atodiad IV, pwynt B(III), fel y'i haddaswyd gan Erthyglau 3 a 4 o Benderfyniad y Comisiwn 2004/370/EC yn awdurdodi dulliau ar gyfer graddio carcasau moch yn y Deyrnas Unedig(1)	Gofyniad i gyflwyno carcasau yn y dull penodedig
	Erthygl 10 ac Atodiad IV, pwynt B(IV), is-baragraff 1, ynghyd ag Erthygl 1 o Benderfyniad y Comisiwn 2004/370/EC, ac Atodiad I iddo, yn awdurdodi dulliau ar gyfer graddio carcasau moch yn y Deyrnas Unedig	Gofyniad i raddio carcasau drwy ddulliau a awdurdodir gan y Comisiwn

(1) OJ Rhif L 116, 22.4.2004, t. 32, fel y'i diwygiwyd ddiwethaf gan Benderfyniad y Comisiwn 2006/374/EC (OJ Rhif L 142, 30.5.2006, t. 34).

Rheoliad Dirprwyedig y Comisiwn	Erthygl 6(1)	Gwahardd tynnu braster, cyhyr neu feinwe arall cyn pwyso, graddio a marcio
	Erthygl 7(1)	Gofyniad ynghylch lle ac amser y dosbarthu
	Erthygl 7(3)(b) a 7(4)(a)	Gofynion ynghylch pwyso'r carcass ac addasu'r pwysau
	Erthygl 12	Gofynion ynghylch dosbarthu drwy dechnegau graddio awtomataidd
	Erthygl 14(1), (2) a (3)	Gofyniad ynghylch pwyso'r carcass er mwyn hysbysu prisiau'r farchnad
	Erthygl 14(4)	Gofynion ynghylch hysbysu prisiau fesul dosbarth
	Erthygl 17(2) o ran y modd y'i cymhwysir at daliadau atodol am garcasau Pwynt 2 o Ran A o Atodiad V	Gofynion ynghylch hysbysu unrhyw daliadau atodol Gofynion ynghylch asesu faint o gig heb lawer o fraster sydd mewn carcasau
Rheoliad Gweithredu'r Comisiwn	Erthygl 1	Gofynion ynghylch y cyfathrebiad rhagnodedig
	Erthygl 9	Gofynion ynghylch dosbarthiadau a phwysau er mwyn cofnodi

prisiau
marchnad
carcasau moch

Erthygl 10

Cofnodi
prisiau'r
farchnad

RHAN 2

<i>(1) Y Rheoliad sy'n cynnwys y ddarpariaeth Ewropeaidd</i>	<i>(2) Y ddarpariaeth</i>	<i>(3) Y cynnwys</i>
Rheoliad Dirprwyedig y Comisiwn	Erthygl 8(1), 8(2)(b), Erthygl 8(3)(c) o'u darllen gydag ail baragraff yr Erthygl honno ac Erthygl 8(4)	Gofynion ynghylch marcio carcassau neu eu labelu
	Erthygl 8(5)	Gofynion mewn perthynas â labelu carcass

ATODLEN 3 Rheoliad 11

Cofnodion: carcassau buchol

1. Canlyniadau'r dosbarthu.
2. Rhif cymeradwyo'r lladd-dy.
3. Rhif lladdiad neu rif cigyddu yr anifail y cafwyd y carcass ohono, fel y'i dyrannwyd gan y gweithredwr.
4. Dyddiad y cigyddu.
5. Pwysau cynnes y carcass ynghyd â nodyn o'r canlynol—
 - (a) unrhyw addasiad a wnaed ar gyfer pwysau oer y carcass, a
 - (b) unrhyw gyfernod a gymhwyswyd.
6. Y fanyleb trin a ddefnyddiwyd.
7. Cofnod bod y cyfathrebiad rhagnodedig wedi ei wneud.
8. Enw, llofnod a rhif cyfresol trwydded ddosbarthu'r person a ymgymrodd â'r dosbarthu.

ATODLEN 4 Rheoliad 16

Cofnodion: carcassau moch

- 1.** Canlyniadau'r dosbarthu.
- 2.** Rhif cymeradwyo'r lladd-dy.
- 3.** Rhif lladdiad neu rif cigyddu yr anifail y cafwyd y carcass ohono, fel y'i dyrannwyd gan y gweithredwr.
- 4.** Dyddiad y cigyddu.
- 5.** Pwysau cynnes y carcass, ynghyd â nodyn o'r canlynol—
 - (a) unrhyw addasiad a wnaed ar gyfer y pwysau carcass oer, a
 - (b) unrhyw gyfernod a gymhwyswyd.
- 6.** Y ganran o gig heb lawer o fraster yn y carcass.
- 7.** Dynodiad a oedd y tafod, gwêr yr arenau, yr arenau a'r diaffram yn gysylltiedig neu wedi'u tynnu ymaith.
- 8.** Cofnod bod y cyfathrebiad rhagnodedig wedi ei wneud.
- 9.** Enw a llofnod y person a ymgwyrodd â'r dosbarthu.